

दिनांक : 01.06.2026

समय : 18.45 बजे

आकाशवाणी जयपुर-अजमेर

समाचार

- केन्द्रीय कृषि मंत्री शिवराज सिंह चौहान खेती-बाड़ी मांय नुवी तकनीक, मशीनां अर वैज्ञानिक तरीका काम लेवण माथे ज़ोर दीनो।
- 10 राज्यां मांय राज्यसभा री 24 सीटां रा द्विवार्षिक चुनाव री अधिसूचना जारी-प्रदेश मांय 3 सीटां सारू चुणाव व्हेला।
- मुख्य सचिव वी.श्रीनिवास कह्यो- राजस्थान रा नुवा कामां री देश मांय सराहवणा व्ही।

अर

- प्रदेश रा केई ज़िलां मांय आंधी-बारिश रो सिलसिलो जारी-कठे-कठे ज़ोरदार बायरो बाजण अर ओळा पड़बा ऊं नुकसाण रा समाचार।

000

देश मांय आज “खेत बचाओ” अभियान सरू करी ज्यो। केंद्रीय कृषि मंत्री शिवराज सिंह चौहान मध्यप्रदेश रा रायसेन ज़िला रा रमासिया गांव ऊं इण री सरूआत कीनी। ई मौके चौहान कह्यो के दुनियाभर मांय खाद रो मोल दूणो व्हेवण पाछे ई केन्द्र सरकार किसानां ने सस्ती खाद मुहैया करावणो तैय कीनो है। वे कह्यो के मृदा स्वास्थ्य कार्ड नी बणा सक्या किसानां सारू खास अभियान चला र अ कार्ड बणाया जावेला। केन्द्रीय कृषि मंत्री कह्यो के अब खेती मांय सही बुवाई, बीमारियां ऊं बचाव अर कम बिरखा री संभावना ने ध्यान राखता थकां वैज्ञानिक तरीका काम लेवणा व्हेला।

-----

30 जून ताई चालण वाळा ई अभियान रा तैत किसान क्रेडिट कार्ड, प्रधानमंत्री किसान सम्मान निधि, फसल बीमा योजना अर मृदा स्वास्थ्य कार्ड सरीखी योजनावां रो फायदो पात्र किसानां ताई पूगावण रा खास जतन कर्या जावेला। ई अभियान रो मकसद खाद ने संतुलित तरीका ऊं काम लेवण ने बधावो देवणो, किसानां ने मौसम ऊं जुड़ी जाणकारी टेमसर देवणो अर पंचायत लेवल माथे जनता री भागीदारी तैय करणो है।

000

केन्द्रीय जल शक्ति मंत्री सी.आर. पाटिल अर विज्ञान अर प्रौद्योगिकी मंत्री डॉ. जितेंद्र सिंह आज पाणी ऊं जुड़्या हलकां मांय बेहतररी सारू मिशन माहा री सरूआत कीनी। वे नई दिल्ली मांय जल अनुसंधान अर विकास रा बारा मांय राखी ज्यी राष्ट्रीय कार्यशाला रा उद्घाटन कार्यक्रम मांय इण री सरूआत कीनी। इण रो मकसद पीवण रा पाणी अर जल संसाधन प्रबंधन, आब-ओ-हवा मांय बदलाव रो सामो करण रो बूतो अर पाणी ने समझदारी ऊं काम लेवण सरीखा हलकां मांय नुवी खोज ने बधावो देवणो है। कार्यशाला मांय पाणी री परेशानी आगी करण रा तरीकां रा बारा मांय विचार कर्यो जावेला। ई मौके जल शक्ति मंत्रालय अर इसरो जल संसाधन आकलन, निगरानी अर प्रबंधन सारू उपग्रह-आधारित अनुप्रयोगां अर उन्नत प्रौद्योगिकियां ने मजबूत बणावण सारू एक करार माथे ई सही कीनी।

000

राजस्थान समेत 10 राज्यां मांय राज्यसभा री चौबीस सीटां रा द्विवार्षिक चुनाव री अधिसूचना आज जारी कर दीरीजी। ई सागे ई पर्चा दाखिल करण रो काम सरू व्हे ग्यो है। प्रदेश ऊं राज्यसभा रा तीन सदस्यां रो चुनाव करयो जावणो है। ई सारू नामपाना आठ जून ताई दाखिल कर्या जा सके है। चुनाव अधिकारी भारत भूषण शर्मा बतायो के पर्चा विधानसभा भवन कमरा नम्बर 106 मांय चुनाव अधिकारी सामी संवारे 11:00 ऊं दोपहरां पाछे तीन बज्यां ताई दाखिल कर्या जा सके है। नामपाना री जाँच 9 जून ने करी जावेला। पर्चा 11 जून ने दोपहरां पाछे 3 बज्यां ताई पाछा लिया जा सकेला। जरूरत पड्यां 18 जून ने वोट पड़ेला अर सिज्यां पांच बज्यां पाछे वोटों री गिणती करी जावेला। ध्यानजोग है के राजस्थान ऊं राज्यसभा सदस्य भाजपा रा रवनीत सिंह बिट्टू अर राजेन्द्र गहलोत अर कांग्रेस रा नीरज डांगी रो कार्यकाल 21 जून ने पूरो व्हे रह्यो है।

000

प्रधानमंत्री स्वनिधि योजना सरू व्ह्यां आज छह बरस पूरा व्हे ग्या है। साल 2020 मांय आज ही रा दिन प्रधानमंत्री नरेन्द्र मोदी इण री सरूआत कीनी ही। इण रो मकसद रेहड़ी-पटरी वाळां ने आसान कर्ज मुहैया करावणो है। योजना रे जरिए हाल ताई 75 लाख ऊं बत्ता लोगां ने 17 हजार 800 करोड़ रुप्या रा कर्ज दिया ज्या है।

000

मुख्यमंत्री भजनलाल शर्मा आज नई दिल्ली मांय भारतीय जनता पार्टी रा राष्ट्रीय अध्यक्ष नितिन नबीन सागे मुलाकात कीनी। ई मौके दोन्यू नेता जनता रा भला ऊं जुड्या न्यारा-न्यारा मुद्दां अर आवती कार्य योजनावां रा बारा मांय चर्चा कीनी।

000

पुलिस महकमा मांय मकान-रेहवास रो काम देख रह्या ए.डी.जी. भूपेंद्र साहू बालोतरा जिला मांय अपराध अर कानून व्यवस्था रा हालात रो जायजो लीनो। वे पुलिस वाळां सागे मीटिंग कर र वां री समस्यावां री ई जाणकारी लीनी। श्री साहू बालोतरा पुलिस थाणा रो दौरा कर र सीएलजी सदस्यां ऊं ई जाणकारी लीनी। ई मौके खबरनवीसां सागे बातचीत करता थकां वे कह्यो के जिला मांय जरूरी साधनां री पूर्ति बेगी ई करी जावेला। ए.डी.जी. कह्यो के पुलिस लाइन सारू जमीं आवंटन री कार्रवाई कर लीरीजी है।

श्री साहू कह्यो के पुलिस मांय नुवा भर्ती व्ह्या कर्मचारियां री सिखावण पाछे तैनाती कर र नफरी री कमी दूर करी जावेला।

000

मुख्य सचिव वी श्रीनिवास राज्य सरकार कानी ऊं कराया जा रह्या नुवा-नुवा कामां री कामयाबी री कहानियां तैयार करण रा हुकम दीना है। वे आज जयपुर मांय अहलकारां सागे राख्यी ज्यी मीटिंग मांय बोल रह्या हा। मुख्य सचिव कह्यो के प्रदेश मांय ग्राम विकास चौपाल, ग्राम रथ अभियान, मुख्यमंत्री विकसित ग्राम अभियान, चंदन वन, माय भारत अर राज उन्नति सरीखी सरकारी कोशिशों ने देशभर मांय बेहतरीन कोशिशों रा तौर ऊं पिछाण मिली है। मीटिंग मांय प्रदेश मांय खनिजां री खोज, नीलामी प्रक्रिया, पीवण रा पाणी री उपलब्धता, साफ-सफाई, पाणत ऊं जुड़ी परियोजनावां अर ऊर्जा हलका मांय सुधारा रा बारा मांय ई चर्चा करी ज्यी। मुख्य सचिव प्रधानमंत्री पोषण शक्ति निर्माण योजना रा कामकाज रो ई जायजो लीनो। वे राज्य री स्कूलां मांय विद्यार्थियां ने पौष्टिक भोजन मुहैया करावण सारू अहलकारां रे लगातार जांच रा हुकम दीना।

000

झुंझुनू जिला रा शिक्षा अर प्रशिक्षण संस्थान-डाइट परिसर मांय सेंटर ऑफ एक्सीलेंस बणायो जावेला। ई सारू शिक्षा मंत्रालय 13 करोड़ रुप्या मंजूर कीना है। विधायक राजेंद्र भांबू अर जिला कलेक्टर डॉ. अरुण गर्ग ई रा काम रो आज भूमि पूजन कीनो। ई मौके विधायक भांबू कह्यो के मंत्रालय झुंझुनू समेत राज्य रा सात डाइट परिसर मांय सेंटर ऑफ एक्सीलेंस बणावण रो फैसलो कीनो है।

000

झुंझुनूं मांय जाट रेजीमेंट री 17वीं बटालियन रो 60वां स्थापना दिवस समारोह उमाव सागे मनायी ज्यो । कार्यक्रम मांय जिला कलेक्टर डॉ. अरूण गर्ग फौजियां सामी आवण वाळी चुणौतियां अर वां रा निपटारा रा बारा मांय चर्चा कीनी । कार्यक्रम मांय पैली वाळा अर मौजूदा फौजी अर फौजियां रा पिरवार वाळा शामिल व्ह्या ।

000

प्रदेश रा बीचला अर ऊगणी जिलां मांय आज ई आंधी-बारिश रो सिलसिलो चालतो रह्यो । राजधानी जयपुर मांय सिंज्यां री पोर बादळा मंड ग्या अर कुठ हलकां मांय छांटो-छिड़को व्ह्यो । अलवर, टोंक, सवाई माधोपुर, दौसा अर सीकर जिलां मांय ई जोरदार बायरो बाजण सागे कठे-कठे हल्की बारिश व्ही, तो कठे-कठे ओळा पड्या । पाली मांय बाज्या जबरदस्त बायरा रे कारण केई रुंखड़ा उखड़ ग्या अर बिजली रा खम्भा पड़ ग्या । करौली मांय ई दोपहरां पाछे बिरखा व्ही, जिण ऊं गर्मी ऊं थोड़ी साता मिली । दूजी कानी नागौर मांय ओळा पड़बा ऊं कपास री साख अर सूरज री रोशनी ऊं बिजली बणावण री मशीनां ने नुकसाण व्ह्यो ।

-----

चित्तौडगढ़ मांय ई तेज आंधी आवण सागे कठे-कठे ओळा पड्या । बूंदी, भीलवाड़ा अर राजसमंद समेत कुछ जिलां मांय जोरदार बायरो बाजण सागे छांटो-छिड़को व्हेवण रा समाचार है । राज्य रा घणखर हलकां मांय लारला तीन दिन ऊं चाल रह्या आंधी अर बारिश रा सिलसिला ऊं दिन री बगत पारो 40 डिग्री सेल्सियस ऊं नीचे उतर ग्यो, जदके रात री बगत ई तापमान 25 डिग्री सेल्सियस रे आरे-सारे दर्ज कर्यो जा रह्यो है । मौसम केंद्र जयपुर रे मुजब आवता एक सप्ताह ताई प्रदेश मांय आंधी-बारिश रो सिलसिलो चालतो रेहवण रा आसार है । 3-4 जून ने बीकानेर, जयपुर, भरतपुर अर अजमेर संभाग रा कुछ हलकां मांय आंधी-बारिश मांय ओजू बधोतरी री संभावना है ।

000

वस्तु अर सेवा कर-जी.एस.टी. री मद मांय लारला महीना एक लाख 94 हजार करोड़ रुप्या ऊं बत्ती रकम भेळी करीजी । लारला साल मई महीना मांय आ रकम एक लाख 88 हजार करोड़ रुप्या ही । ई अवधि रे दौरान सामान री कर योग्य पूर्ति मांय 26 दशमलव 9 फीसदी री जदके सेवा हलका मांय 22 दशमलव 2 फीसदी री बधोतरी दर्ज करीजी ।

000

भारत-ओमान व्यापक आर्थिक साझेदारी समझौतो-सी.ई.पी.ए. आज लागू व्हे ग्यो । वाणिज्य अर उद्योग मंत्री पीयूष गोयल आ जाणकारी दीनी । वे बतायो के ई करार ऊं दोन्यू देशां बीचे माली अर रणनीतिक रिश्ता और मजबूत बणेला ।

000